

Мектепалды жас тобы

Тақпақтар, әндер: Құстар туралы тақпақтар

Торғай

Торғай, торғай тоқылдақ,
Жерден бидай шоқып ап,
Бөтегесі бұлтиып,
Шик-шиқ етіп отырмақ.
Торғай, торғай тоқтаған
Торғайды торғай мақтаған.
Бір торғай ұшса боранда,
Бәрі жабылып жоқтаған.



Көгершін

Көк көгершін, көгершін,
Көгершін келер жем үшін,
Балалар жем себелік,
Жем жесін де семірсін.
Сөйтіп, қолға үйренсін.
Бұл есті құс тіл алғыш
Үйренген соң көрерсің.



Қарға

Қарға, қарға, қарғалар,
Қар үстінде жорғалар.
Боран соқса, қор болар,
Бұтаға келіп қорғалар.
Қысып кетсе сары аяз,
Көзден жасы сорғалар.
Қар үстінде жем көрсе,
Қапелімде қолға алар.
Екі шоқып бір қарар,
Деп «жолымды аңғарар».



Қырғи

Қырда қырғи қиялар,
Жарға келіп ұялар.
Қырғи қанаты қиық,
Балапаны кермиық.
Көктегі құстың баласы,
Сайда болар ұясы,
Сайға толып сел келсе,
Сарғайып жылар анасы.



Сауысқан

Ала қанат сауысқан,
Жауыр атқа жабысқан.
Ойда жауыр көрінсе,
Ойбайлатқан сауысқан.
Қырда жауыр көрінсе,
Қиқаңдатқан сауысқан.



"Торғай" (ел аузынан)

Торғай-торғай тоқылдақ,
Жерден тары шоқып ап,
Бөтегесі томпайып,
Түймедей боп монтыйып,
"Шіп-шіп" десіп отырар,
Торғай-торғай топтаған.
Тоғайды торғай мақтаған,
Бір торғай ұшса боранда,
Іздеп бәрі жоқтаған.













